

## ‘Nnarrè ‘na cantunèra

Ammucciatu ‘nnarrè ‘na cantunèra  
cu l’occhi serri-serri,  
pustiava na picciuttedda.  
Aspettava ca nisciva di casa  
p’avvicinalla e dìricci quarchi cosa.  
Comu nisci, finta ca passavu di dda pi casu,  
mi cci misi sùbitu a lu latu  
e caminannu cuminciavu a parlàricci.

A ddi tempi unn’era facili parlari cu ‘na picciotta.  
Unnè comu ora c’ammumentu si fannu tutti cosi!

Di ddu minutu ca nni taliamu  
li gammi mi cuminciaru a trimari,  
lu cori mi stava scuppiannu,  
li paroli mi niscivanu pi forza,  
nun mi ricordu cchiù chiddu chi ci dissì.

Mi ricordu sulu ca mentri chi caminàvamu,  
mi vidu spuntari di ‘nnarrè ‘na cantunèra a sò patri,  
cu un ‘mmarruggiu ‘mmanu  
e cu l’occhi puntati diritti nni mia.

Iddu fermu di dda punta, iu fermu di statra punta,  
mi parsi di èssiri ‘nta la scena di Orlandu e Rinaldu:  
nni mancàvanu sulu li spati pi fari lu duellu.

Nun sapennu soccu fari,  
mi calavu finta d’attacàrimi lu lazzu di la scarpa,  
mentri iddu mi passa vicinu e mi dici:  
“ nicarè ... camina dintra”.

A stu puntu, tuttu scantatu,  
pigliavu la prima cantunèra chi mi vinni di pettu  
e scumparivu.

A pinzàricci, ora mi veni d’arridiri,  
chiddu ca mi dispiaci è ‘na cosa ...  
ca nun ricordu chiddu chi cci dissì!  
Certu tempu ‘na passatu, nun fu aieri.  
Sacciu sulu ca dda picciuttedda,  
ora, mi veni muglieri.

2014 Giuseppe Cardella